

15. oktober 2013

UKA 2013/37
Karl Kristian Kruse

2014-mi atuutilersussamik Kangaatsiamiit Qaanaaq angullugu upernaakkut appanniarsinnaaneq 01. september-imiit - 29. februar-imut atuuttup, ukiukkut sikuusarnera pillugu tamakkiisumik malitsinneqarsinnaanngitsup naleqqussarnissaa pillugu upernaakkut appanik piniarsinnaanerup maajip qeqqata tungaanut sivitsorneqarnissaanik, Naalakkersuisut sulissuteqaqqullugit Inatsisartut aalajangiiffigisassaattut siunnersuut.

(Inatsisartunut ilaasortat Gerhardt Petersen aamma Siverth K. Heilmann, Atassut)

Siumup siunnersuuteqartut quttavigai pingaaruteqarluinnartumik siunnersuuteqarmata, Siumumi pingaartilluinnarparput nunatsinni pisuussutit inuiaqatigiinnut tamanut iluaqutigin eqarnissaat, uumalu siunnersuutip ilitsoqqussaralugu nerisaqarneq annertuumik qularnaarlugulu periarfississavaa.

Aammalu kinguaanut ingerlatitseqqii sinnaanermut periarfississallugit, siunnersuummi ullu-liunneqartoq sivitsuallannissaanut piniarsinnaanerup 1. september-imiik maj-ip 15-anut akornutissaqartinngilarput, pineqartumilu tassa Qeqqata Kommuniata avannamut killeqarfianiik Qaanaami aqutsiviup avannamut killeqarfianut kiisalu Tunumi appanniarsinnaaneq taparserparput. Ilisimavarpullu Qaanaami immikkut isigalugu junip 15-at angullullu appanniarsinnaammata, Ittoqqortoormiunilu 31. maj tikillugu immikkut periarfissaqartut.

Aamma mitit piniarneqarnerisa kitaani Nunap Isuaniik Qaanaap avannamut killeqarfianut nunattalu kangiani maj-ip naaneranut sivitsorneqarsinnaanerata Siumup kaammattuuti-gaa, siunnersuuteqartut ilanngullugit kissaatigimmassuk piniarneqartarnerisa naliliivigineqarnissaat.

Ilanngullu Siumumit kissaatigissuarput timmissanik mannissarniartarnermik ammatitsisinnaanermut misissuisoqassasoq assersuutigalugu imeqqutaallat mannissarneqartarnerata ammaqpinneqarsinnaanerata.

Siumup kissaatigaa timmissat illersorneqarnerat piniagaaneralu pillugit Namminersorne-rullutik Oqartussat nalunaarutaat nr. 8, 2. marts 2009-meersoq, tamaat nutaamik inuiaqatigiillu tamarmik iluaqutiginnaallugulu ilaleeqatigiiffiginnaasaannik UPA 2014-mut Naalakkersuisut siunnersuusiortut Inatsisartut aaliangersaaffissaannik suliaqassasut, taamatullu siunnersuusiortermi SIUMUP kaammattuutigaa piniarnermut siunnersuisoo-qatigiit aammalu atuisut, tassa piniartut kattuffiillu peqataatilluinnarlugit timmissanik sineriammi isorartuumi inoqutigiit tamarmik ilaliiffiginnaasaannik siunnersuusiussasut, taa-matut innersuussinitsinni tunngavigaarput nunarput isorartooq annertuumillu imartaqartoq ilaalu annertooq aamma sikusartuummat, timmissat illersorneqarnerat piniagaasarneralu pillugit sumiiffinnut naleqquttunik nalunaarummik pisariaqartitsisoqartoq ersarimmat taa-matut SIUMUMIT innersuussaarpugut.

Naggataatigut timmissat kalaallinik innarliartuinnarneqarneranik oqallinneq illuatungilerlugu, qularnaarlugit misissugassanngorterussupparput, timmissat ineqarfiinik kiisalu piaqqi-orniarnernannik annertuumik innarliartuinnartut naajat, naajarujussuit, nattorallit, kissaviarsuit, kiinaaleeqqat teriannissallu sukumiisumik misissorneqassasut, inuiaammi kalaallit piniakkaminnik innarliiniarlutik piniangisaannarmata, pisuutinniarsarineqartuarnerata illuatungaatigut eqqissisimatitat uumasooqataat qanoq sunniinerlutsigisut aamma uppernar-sarneqartariaqalermata.

Siumumiik ilisimavarput pineqartut iluini allaat kinguaat timmissat nalulermatigit, pisariaqarluinnartippaa nalunaarummik nutarterinissaq, taamaattumik allannguinnissaq ilalerparput, innersuullugulu Aalisarnermut Piniarnermullu Ataatsimiititaliamut suliareqqitassanngorlugu.